

■ COLUMNA

Tgi ei la cuolpa?

DA GION CAVIEZEL

Avunda. Ussa piardel jeu mia pazienza. Puspei vegn miu buob cun calzers tschufs en stiva, puspei ha l'auter emblidau enzatgei en scola e survegn in castitg. Veramein, jeu poi buca pli.

Lu havein nus puspei linagada giu ina discussiun pervia tgi che fa dapli el hushalt, atgnamein ei la discussiun stada in monolog da mia dunna che jeu stuessi far dapli, silmeins lavar las toiletas ni far la cuschina ed aschia vinavon. Oh, per l'amur da Diu, ve-va ella schliata luna.

Jeu mirel giadora, il sulegl tarlischia sco sch'ei fuss la fin dil mund, davos las muntognas spetga in cordun da nibels stgirs, il vent splatrogna pumera ed in sac da plastic saulta suenter la via. Aha, il favugn. Ussa vegn ei gest endamen a mi. Quei huara favugn ei la cuolpa. Gie. Quei eisi. Aschia sco il fa-



vugn suffla va il mund hulahopp.

Il davos gi hai jeu fatg ina cagada: jeu hai empleniu il tanc da miu auto cun Benzin bleifrei enstagl Diesel. Quei ei la verdad. Aber ussa sai jeu silmeins tgi che ei la cuolpa: il favugn. Naturalmein. Manegieis, jeu fussel aschi tups ed aschi in tgutg?

Ed ier? La schefa ha telefonau, daco che jeu ha gi aschi bia spesas, quei mondi lura buc ed insumma seigi ella fetg malcuntenza culla lavur che jeu

fetschi. Bla, bla, bla. Jeu gitgel mo in plaid: favugn.

Era sch'ins teidla tgei che quei politicher culla buca gronda gi: il mund calli dad ir entuorn sch'ins voteschi buca gie. E tschel tscholi ri sil placat e manegia, mo el seigi capavels da governar la capitala. Il favugn.

Eco stat ei cul ballapei? Quei gi cura ch'igl FC Turitg ei sfunsaus en la secunda liga eri in'aura da favugn. In'otra explicaziun dat ei buca. Quei ei la risposta. Igl ei il favugn che fa ch'il mund va sutsu.

Ed ell'America elegian ei quei Clown Trump sco president. Sche quei ei buc in'enzenna dil tschiel, ähem, jeu manegiel in'enzenna dil favugn.

Uss eisi clar per mei: Per tut ei mo il favugn la cuolpa. Quei ei la suletta explicaziun pusseivla: il favugn e mo il favugn ei la cuolpa. Per tut. Per cletg cala quel zacuras.